

ধোকার ডালনা

বুদ্ধদেব গুহ



দ্রা হিভার শিউশরণ গাড়ি আভারগ্রাউন্ড গারাজে পার্ক করে এসে বলল, কাল কিতনা বাজি আয়েগা মেমসাব ?

স্মিতা একটু ঝাঁঝালো গলাতে বলল, পুছনেকা ক্যা হ্যায়, রোজ সুবে যিতনা বাজি আতা হ্যায় ওহি টাইমমে আও ।

জী হাঁ ।

বিরঞ্জির সঙ্গে বলে, ফ্ল্যাটের দরজার ল্যাচটা খোলা রেখে দিয়ে কী ভেবে একটু হেসে সেটাকে লাগিয়েই দিল । তারপর ইন্টারকমের রিসিভারটা তুলে একতলার রিসেপশনে ফোন করে জিঙ্কস করল, সেন সাহেব কি বাইরে গেছেন ? নাইন্থ ফ্লোর থেকে বলছি ।

নীচ থেকে বলল, ম্যাডাম আমার ডিউটি তো বেলা চারটেতে শুরু হয়েছে । আমি আসার পরে যাননি । তবে যদি গারাজের পেছনের দরজা দিয়ে সোজা গেট দিয়ে বেরিয়ে গিয়ে থাকেন তাহলে পেছনের গেট এর সিকিউরিটি গার্ড বলতে পারবে ।

বলেই বলল, গাড়ি নিয়ে গিয়ে থাকলেও আমি আসার আগেই গেছেন । লাল মারুতি নিয়েই তো যাবেন গেলে । ও গাড়ি আমি যেতে দেখিনি । গারাজ থেকে উঠে গাড়ি তো আমার সামনে দিয়েই যেত, গেলে । তবে চারটের আগে গিয়ে থাকলে জানি না ।

পেছনের গেটের সিকিউরিটিকে একবার জিঙ্কস করুন । বড় বেশি কথা বলেন আপনি ।

ঠিক আছে। জিজ্ঞেস করে আমি জানাচ্ছি।

সারাদিন এয়ারকন্ডিশনড ঘরে কাজ করার পর এয়ারকন্ডিশনড গাড়ি চড়ে বাড়ি ফিরেই গরমে গা একেবারে প্যাচপ্যাচ করে। তবু বিমলেন্দুকে ফ্ল্যাটের সেন্ট্রাল এয়ারকন্ডিশনার চালাতে মানা করেছে ও। দুপুরটা বেডরুমের উইন্ডো-টাইপটা চালিয়ে বিমলেন্দু ঘুমোয় বা টিভি দেখে। সন্ধ্যাবেলা বাড়ি ফিরে দুজনে মিলে চা খাওয়ার পর দুজনেই একসঙ্গে চানে যায়। বিমলেন্দু গেস্টরুমের বাথরুমে আর স্মিতা বেডরুমের বাথরুমে। বাথটাব-এ শুয়ে থাকে মিনিট পনেরো অনেকখানি বাথসল্ট ছড়িয়ে, সারা শরীর এলিয়ে দিয়ে। শরীরের অণু-পরমাণু থেকে ক্লান্তি অপনোদিত হলে তারপরই ভাল করে তোয়ালে দিয়ে গা মাথা মুছে সর্বাঙ্গে ইউডিকোলোন এবং পাউডার লাগিয়ে বারমুডাস আর কটন-এর ঢোলা টপ পরে বসার ঘরে আসে। না বলে তো কেউই আসে না কোনও ব্যস্ত মানুষের কাছে। আজ কারও আসার কথা নেই। অফিসের পরে কেউ এলে ক্লাস্ত ও লাগে। শনি-রবির কথা আলাদা। বিমলেন্দুই তার হাউসকিপার হাজব্যান্ড, নিজের কিছুই প্রায় করতে হয় না, তবু উইকডেইজ-এ কারও আসার থাকলে টেনশন হয়।

রোজ খায় না, তবে সপ্তাহে দু-তিনদিন খায় একটা কী দুটো। ব্লাডিমেরি। খুব যত্ন করে বানিয়ে দেয় বিমলেন্দু। বিমলেন্দু হুইস্কি খায় সোডা দিয়ে। স্মিতা বলে স্কচ খেতে কিন্তু বিমলেন্দু খায় না। রয়াল চ্যালেন্জই খায়। বলে, পরের পয়সাতে অত ফুটুনি ভাল নয়।

আমি কি তোমার পর ? স্মিতা বলে।

পরই তো। স্বামী-স্ত্রীর সম্পর্ক হলেই কি আপন হয় ? তাছাড়া যে স্বামী, স্ত্রীর আশ্রিত জীব, যে রোজগারের জন্যে কাজ করে না, যার আলাদা রোজগারও নেই, এ কাগজে সে কাগজে দুটো একটা ফিচার লিখে কখনও-সখনও সামান্য টাকা যে পায়, তার সমঝে চলাই উচিত।

স্মিতা উত্তরে বলে, তোমার নানারকম হ্যান্ড-আপস হয়ে গেছে ইদানীং। তুমি তো এ রকম ছিলে না বিমু। তুমি কি ভুলে গেছ যে, একটা সময়ে তোমার টিউশনির টাকাটাই আমাদের একমাত্র রোজগার ছিল। তোমার সেই বহু-কষ্টার্জিত রোজগারে আমরা কত কষ্ট করে থেকেছি -- আমার পড়াশোনা তোমার জন্যেই চালিয়ে যেতে পেরেছি। আমি ভুলিনি সে সব দিনের কথা। তখন আমাদের আরাম বলতে কিছুই ছিল না কিন্তু কত আনন্দ ছিল বলো তো ?

বিমলেন্দু উত্তর দেয় না। চুপ করে থাকে।

স্মিতা বলে, আজ কী মেনু ?

টোমাটো স্যুপ, ব্রাউন ব্রেড, চিকেন রোস্ট উইথ মেশড পটাটো। আর রসগোল্লার পায়েস।

বা: দারুণ। স্যুপটা কি ফ্রেশ টোমাটোর না নর-এর ?

ফ্রেশ টোমাটোর। আমি যতদিন আছি, তোমার বিনি মাইনের কুক, ততদিন প্যাকেটের স্যুপ খাবে কেন তুমি ?

যাই বলো আর তাই বলো, তোমার রান্নার হাতটা কিন্তু ক্রমশই ভাল হচ্ছে।

না হলে যে চাকরি যাবে। খাব কী ?

স্মিতা রেগে উঠে বলে, দ্যাখো সব সময়ে এক ইয়ার্কি ভাল লাগে না।

ইয়ার্কি ?

ইয়ার্কি নয় ?

এবারে জামাকাপড় ছেড়ে চানে যেতে হয়। বিমলেন্দু কোথায় গেল তাকে না বলে ? কোনও নোটও রেখে যায়নি। ধীরে ধীরে অনেকই বদলে যাচ্ছে ও। স্মিতা নিজেও কি বদলাচ্ছে না ? বদলেছে ? হয়তো। কিন্তু নিজের বদলটা নিজের চোখে পড়ে না তেমন করে। আয়নার সামনে দাঁড়ালে নিজের মুখটা একইরকম দেখায় নিজের চোখে।

স্মিতা বসার ঘরের সোফা ছেড়ে উঠে, দরজার ল্যাচটা খুলে দিল। বিমলেন্দু ফিরে এলে ওর ডুপ্লিকেট চাবি দিয়ে খুলে ঢুকবে। ল্যাচটা লাগানো থাকলে ঢুকতে পারবে না। তারপর সেন্ট্রাল এয়ারকন্ডিশনারটার সুইচ অন করে জামাকাপড় খুলতে বেডরুমে গেল। এয়ারকন্ডিশন একটা নয়, চারটে। Split Aircondition। মেশিনগুলো সব বাইরে। যাতে শব্দ না হয় ভেতরে। তবে সুইচ একটাই। এছাড়াও প্রত্যেক বেডরুমে উইন্ডো-টাইপ মেশিনও আছে।

বাথরুমে ঢুকেই দেখল গিজারের সুইচটা অফ করা। রোজ বিমলেন্দু ওদের বেডরুমের গিজারের সুইচটা পাঁচটা নাগাদ 'অন' করে দেয়। সুইচটা অন করাই থাকে। অটো কাট-আউট আছে। লাগ লাগে জল গরম হলেই নিভে যায়। বাথটাব-এর কল খুললে তবেই আবার আলো জ্বলে ওঠে। গিজারের সুইচটা অফ করা আছে মানেই বিমলেন্দু অনেকক্ষণ হল বেরিয়েছে।

বেডরুমে যাওয়ার আগে একবার ড্রইংরুমে গিয়ে কম্পিউটারটার ঢাকনি খুলে মাউসটা হাতে নিয়ে সামান্য সার্ফ করে দেখল তার বাড়ির ই-মেইল-এ কোনও মেসেজ আছে কি না। ছস্টন থেকে মুন্নির ই-মেইল পাঠানোর কথা। একটি চাইনিজ ছেলের সঙ্গে তার এনগেজড হবার কথা গতকাল। ছেলোটর নাম চাং ওয়ান।

কম্পিউটারের কাছে গিয়েও কী ভেবে আবার বাথরুমেই ফিরে গেল। গিজারটা অন করে দিয়ে তারপর ফিরে এল। গরমের দিনে গরম জল না হলেও চান করা যায় কিন্তু অভ্যেস হয়ে গেছে। ড: চোপরা বলেছিলেন, ওর বাতের খাত। সারা বছর গরম জলে চান করাই ভাল। তাই ...

কম্পিউটারের সামনে এসে সেটাকে খুলল। না: কোনও মেইল নেই। একবার কিচেনে গিয়ে ফ্রিজটা খুলল। তরিতরকারি, ডিম, চিকেন, ল্যান্সস্লেগ লেগ, হ্যাম, বেকন, সসেজ-এ ফ্রিজ ঠাসা। রেড মিট খেতে ডাক্তার চোপরা একেবারে মানা করেছেন দুজনকেই অথচ বিমলেন্দু রেড মিটই খাবে জেদ করে। ড. চোপরার কথা ও শোনে না,

হাজারার মোড়ের এক হোমিওপ্যাথকে দেখায়। বলে, গরিবের হোমিওপ্যাথিই ভাল। এক পাশে বিয়ারের বোতল। তার পাশে কাসুন্দির দুটি বড় বোতল। স্মিতা বলে যে, ইটালিয়ান মাস্টার্ড খাও। তা না, গড়িহাট বাজার থেকে কাসুন্দিই কিনে নিয়ে আসবে। ব্রেকফাস্টে লিচু আর কালোজাম খাবে কাসুন্দি দিয়ে। সঙ্গে ডাবল ডিম-এর পোচ, সসেজ ও বেকনের সঙ্গে। দেদার কাসুন্দি ঢেলে। কিছুদিন হল লক্ষ করেছে স্মিতা যে, ও যাই করতে বারণ করে বিমু ঠিক তাই করে। স্মিতাকে ডিফাই করার একটা চেষ্টা তো আছেই, চেষ্টাটা এগজিবিটও করে। সেটাই খারাপ লাগে স্মিতার।

দরজা খোলা ফ্রিজটার সামনে দাঁড়িয়ে থাকতে থাকতে স্মিতার মনে পড়ল বহুদিন ও নিজে হাতে ফ্রিজের দরজা খোলেনি। ভাল করেই দেখল ভিতরে, না: ধোকার ডালনা তো নেই।

কথা ছিল, শনি রবিবার ও ছুটির দিনে ও নিজেও দু'একপদ রান্না করবে কিন্তু সে কথা রাখা যায়নি। অভ্যেস একবার ছেড়ে গেলে তাকে ফিরিয়ে আনা বড়ই কঠিন। রান্না করার অবশ্য দরকার হয় না ছুটির দিনে। পার্টি তো লেগেই থাকে। তাছাড়া, এখন কলকাতাতে খাওয়ার জায়গার অভাব? শুধু পকেটে টাকা অথবা ক্রেডিট কার্ড থাকলেই হল। ওবেরয় গ্রান্ডের থাই রেস্তোরাঁ, তাজ-এর চাইনিজ, নয়তো মেরিনল্যান্ড চায়না গুরুসদয় রোডে নতুন চাইনিজ রেস্তোরাঁ হয়েছে দ্যা বেস্ট ইন টাউন। এতদিন তাদের বার-লাইসেন্স ছিল না। এখন সেটাও পেয়েছে। তাছাড়া, ওটার মালিক নাকি এক বাঙালি -- "উজালা। চার বৃন্দওয়ালার" যিনি মালিক, তিনিই। ফ্যানটাস্টিক। কে বলে বাঙালি ব্যবসা করে না? 'মেরিনল্যান্ড চায়না'-তে যখন খায় তখন কনজিউমার্স সারপ্লাসটা যেন বাঙালি মালিকানার কারণে অনেকখানি বেড়ে যায়।

ডাইনিং রুম-এর ঘড়িটাতে দেখল, সাড়ে সাতটা। ও প্রায় পঁয়তাল্লিশ মিনিট হল বাড়ি ফিরেছে। কী করে সময় যায়। এবারে সত্যিই একটু উদ্বিগ্ন হল স্মিতা বিমলেন্দুর জন্যে। সে কোথায় গেল সে জন্যে তো বটেই, ফ্রিজে রান্না করা কোনও খাবারই নেই যে, সে জন্যেও। ড্রাইভারকেও ছেড়ে দিয়েছে। নইলে, শরৎ বোস রোডের টুটু বসুর 'ট্যাংরা কাইয়েন' থেকে কিছু চাইনিজ খাবার আনিয়ে নিতে পারত।

কিন্তু বিমু গেলটা কোথায়? চিরদিনের ইরেসপনসিবল লোক একটা। আক্কেল বলে কোনওদিনই কিছু ছিল না। এখন করে কী স্মিতা? এমন কখনও করেনি আগে বিমলেন্দু। চিন্তিত মুখে টেলিফোনের পাশের সোফাটাতে বসে প্রদ্যুম্নকে ডায়াল করল। ধরিত্রী ধরল। বলল, হাই স্মিতা। লং টাইম নো সি। গজদারের বাড়ির পার্টিতে যাচ্ছে তো আগামী শুক্রবারে। হোপ টু সি ইউ দেয়ার।

এখনও ঠিক নেই ধরিত্রী। একটা ব্যাপারে ফোন করছি এখন। বাই এনি চান্স বিমলেন্দু কি প্রদ্যুম্নর কাছে গেছে?

না তো! বিমলেন্দু তো গত ছ'মাসে একদিনও আসেনি, এমনকী একটা ফোনও করেনি। প্রদ্যুম্ন বলছিল বিমলেন্দু নাকি ইংরেজিতে উপন্যাস লিখছে।

বুলশিট।

স্মিতা বলল। আকাশ-কুসুম অনেক কল্পনাই তো করল জীবনে, সত্যি সত্যি কোনটা আর করল। তারপর বলল, যে কোর্টশিপের সময়ও আমাকে একটা চিঠি লেখেনি সে লিখবে উপন্যাস! জিনিয়াস ইজ নাইনটি পার্সেন্ট পারসপিরেশন

অ্যান্ড ওয়ান পার্সেন্ট ইন্সপিরেশন ধরিত্রী। মেহনত যে করতে না পারে, বা করতে না চায়, তার কিছুই হয় না।

ইংরেজিতেই লিখুক কী বাংলাতে, লেখা কি অত সহজ কর্ম নাকি ?

আই ডোমো।

তাহলে তোমাদের ওখানে যানি। প্রদ্যুম্নকে একবার জিজ্ঞেস করবে ?

এই নাও কথা বলো।

হাই।

হাই।

বিমলেন্দু ইজ মিসিং।

লালবাজারে খবর দেব কি ?

না, এখনও নয়, তবে ব্যাপারটা চিন্তার। এমন কোনওদিনও করে না। ফোন না করে একটা নোট না লিখে এমন নিরুদ্দেশ হওয়া, আনখিংকেবল।

যাই হোক, আমি বাড়িতেই আছি স্মিতা। দরকার হলে তো জানাবেই, বিমু বাড়ি ফিরলেও একটা ফোন করে আশ্বস্ত করো।

থ্যাঙ্ক ইউ প্রদ্যুম্ন।

আমি কি তোমার ওখানে চলে যাব ?

প্রদ্যুম্ন বলল।

না না তার দরকার নেই। হলে, জানাব।

এই প্রদ্যুম্ন একজন ওভার-সেক্সড পুরুষ, বিমু যেমন আন্ডার-সেক্সড পুরুষ। আসলে সেক্স-এর ব্যাপারে মনটাই যে আসল এই সরল সত্যটা দুজনের একজনও বোঝে না। প্রদ্যুম্ন স্মিতাকে ফ্রেডরিক ফরসাইথ-এর 'দ্যা কাপলস' বইটি পড়তে দিয়েছিল। মানে, প্রেজেন্ট করেছিল ওর এক জন্মদিনে অনেক কিছু লিখে-টিখে। বইটি ধীরেসুস্থে পড়ার পর স্মিতা বুঝেছিল কেন ওই বইটিই দিয়েছিল প্রদ্যুম্ন। পুরুষমাত্রই ছুকছুকে, পরের রান্নাঘরে ঢুকে ছলো বেড়ালের মতো ঢেকে-রাখা মাছ খেয়ে যেতে চায় চুরি করে। সে সব অর্ডিনারি বেডালকে তাড়া দিলেই তারা জানলা গলে লাফিয়ে পালায় কিন্তু প্রদ্যুম্নর স্বভাবটা ছুকছুকে নয়। ওর স্বভাব ছেকা দেয়। গরম লোহার মতো ওর স্বভাব। ওকে শাফেস্টা

করতে তাড়া দেওয়াই যথেষ্ট নয়, হাতুড়ির দরকার। হাতুড়ি খেয়েওছে সে একবার স্মিতার কাছে। পুরুষ জাতটার ওপরেই স্মিতার ঘেমা ধরে গেছে। সেই প্রেক্ষিতে তার সঙ্গী বিমলেন্দু একেবারেই অন্যরকম। ভেরি রেসপেক্টেবল। ইন অল রেসপেক্টস। লিভ-টুগেদার করলে এমন পুরুষের সঙ্গেই করতে হয় যে মায়ের মতো তার নারীকে আগলে রাখে, কমলালেবুর পায়ের পায়েস করে খাওয়ায়, আম-আইসক্রিম, চকোলেট স্যুফলে, যখনই আদর করতে বলে চেটেপুটে বিমলেন্দু আদর করে স্মিতাকে। স্মিতার সবরকম শারীরিক ও মানসিক সুখকে নির্বিঘ্ন করে। সে যে স্মিতার রোজগারে খায় সে জন্যে তার কিছুমাত্র কমপ্লেক্স নেই, ছিল না অস্তত এত বছর, কিছুদিন হল কী যে হচ্ছে।

এমন সময়ে ইন্টারকমটা বাজল।

বিমু এল কি ?

পরক্ষণেই নিজেকে বলল, বিমু এলে নীচের সিকিউরিটি কাউন্টার থেকে ইন্টারকমে খবর দেবে কেন ? সে তো নিজেই উঠে আসত।

রিসিভার তুলে বলল স্মিতা, গলার স্বরকে প্রয়োজনেরও বেশি গভীর করে, ইয়েস।

মেমসাহেব, একজন এসেছেন একটা টিফিন ক্যারিয়ার নিয়ে। সঙ্গে সাহেবের চিঠি।

কোন সাহেবের ? সেন সাহেবের ?

হ্যাঁ মেমসাহেব। আমাদের সাহেবের। পাঠিয়ে দেব ওঁকে ?

এক মুহূর্ত ভাবল স্মিতা, তারপর বলল, দিন, পাঠিয়ে দিন ওপরে। একটু পরে দরজার বেলা বাজল। দরজা খুলতেই দেখল মলিন পোশাকের দীন চেহারার বছর শোলো-সতেরোর একটি ছেলে টিফিন ক্যারিয়ার এবং একটি চিঠি নিয়ে দরজাতে দাঁড়িয়ে। ছেলেটি যে আলিপুরের এই ঝকঝক-তকতক মাল্টিস্টোরিড বাড়ির বৈভবে অত্যন্ত ক্লিষ্ট ও ভীত তা তার মুখ দেখেই বোঝা গেল। ওগুলি স্মিতার হাতে দিয়ে সে বলল, আমি যাই ?

তুমি কে ?

অত্যন্ত রুঢ়স্বরেই জিজ্ঞেস করল স্মিতা।

ছেলেটি বলল, চামেলি আমার দিদি হয়।

কে চামেলি ? কোন চামেলি ?

চেতলার চামেলি।

যে আমার ফ্ল্যাট ঝাড়পৌছ করত, রান্না করত ?

হ্যাঁ।

তার সঙ্গে সেন সাহেবের কী সম্পর্ক ?

তা তো আমি জানি না। বিমুদা আপনাকে এই চিঠি আর টিফিন ক্যারিয়ারে করে ধোকার ডালনা পাঠিয়েছেন। দিদি সারাদিন ধরে বানিয়েছে।

বলেই বলল, আমি যাই এবারে ?

টিফিন ক্যারিয়ারটা নিয়ে যাবে না ? পরের জিনিস রাখি না আমি।

না, না, সে পরেই হবে খন। আমি এখন যাই।

স্মিতাকে আর কিছু বলার সুযোগ না দিয়েই ছেলেটি দুডদাড করে সিঁড়ি বেয়েই চলে গেল দৌড়ে লিফ্ট-এর অপেক্ষাতে না থেকে। আলিপুরের এই বারোতলা বাড়ি দেখে তার বোধহয় মাথা ঘুরে গেছিল। বাইরে থেকে দেখা এক, আর বাড়ির ভেতরে ঢুকে দেখা আর এক।

অপমানে, রাগে, খেন্নায় স্তম্ভিত হয়ে বসে পড়ল স্মিতা সোফার উপরে টিফিন ক্যারিয়ারটাকে কিচেনে রেখে এসে।

টেলিফোনের পাশে খামে-বন্ধ চিঠিটি বিমুর। তাতে কী আছে তা জানার এক তীব্র কৌতূহল হওয়া সত্ত্বেও চিঠিটা খোলার সাহস তার হল না তখনি। চামেলির মুখটা মনে পড়ল। কালোর মধ্যে মিস্তি মুখটি। লম্বা ছিপছিপে গড়ন। মাথা ভরা চুল। তাতে আবার গন্ধ তেল মাখত। স্মিতা একদিন বলেছিল বিমুকে, 'ছুছুন্দরকি শরপর চামেলিকি তেল।' বিমু হেসেছিল। মেয়েটির চোখ দুটিও ভারি সুন্দর। বিমু চামেলি বহাল হওয়ার দিনই আড়ালে বলেছিল, এ যে বনলতা সেন। একে কোথেকে যোগাড় করলে ?

সবসুদ্ধ বছর দেড়েক কাজ করেছিল চামেলি। নাস্তা, দুপুরের খাওয়া আর বিকেলের চা খেত। রাতের রান্না করে দিয়ে চলে যেত। ক্লাস এইট-নাইন অবধি পড়েছিল চামেলি তারপর বাবা মারা যাওয়াতে আর পড়াশুনো করতে পারেনি। ভারি সভ্য-ভব্য ছিল। পরিষ্কার-পরিচ্ছন্নও। মেয়ে ভদ্রঘরেরই, অবস্থা বিপর্যয়ে অমন কাজ নিতে বাধ্য হয়েছিল। মাইনেও নিতো পনেরোশো টাকা। তবে ইট ওজ ওয়ার্থ। ওর ছোট ভাইয়ের টাইফয়েড হওয়াতে ঘন ঘন কামাই করতে লেগেছিল বলেই হঠাৎই মেজাজ করে ছাড়িয়ে দিয়েছিল স্মিতা তাকে। বিমু কিছু বলেনি। তারপরে ভাল কাজের লোক আর পাওয়া যায়নি বলেই লোক আর রাখা হয়নি। বিমুই সব চালিয়ে নিত। চামেলি ফোনে এমনভাবে কথা বলত সকলের সঙ্গে যে সকলেই অবাক হয়ে যেত। ওরা বাড়িতে না থাকলে সুন্দর হস্তাক্ষরে ফোনের মেসেজ লিখে রাখত। সবই ভাল। কিন্তু বিমু ! ছি ! ছি ! কী রুচি। পুরুষমাত্রই কী এরকম ?

ফোনটা বাজল।

বিমু ফিরেছে ? আমি কি যাব ?

প্রদ্যুস্মনর গলা ।

একটু চুপ করে থেকে স্মিতা বলল, থ্যাঙ্ক ইউ । হ্যাঁ । ফিরেছে ।

দাও তো রাসকেলটাকে । আই উইল গিভ হিম আ থ্রাশিং ।

স্মিতা বলল, চানে গেছে । কাল কোরো । আজ টায়ার্ড ও আছে । যা হিউমিডিটি ।

গেছিল কোথায় ?

ওর এক বন্ধু মারা গেছে ।

আই সি ! তা বলে যেতে কী ছিল ?

সেই তো ... । অস্ফুটে বলল, স্মিতা । ওকে তো জানেই, ওইরকমই । তারপর আরও একটু চুপ করে বসে থেকে বিমলেন্দুর চিঠিটা খুলল ও ।

স্মিতামেমসাহেব,
কল্যাণীয়াসু,

ব্যাপারটা ঘটতই । আজ আর কাল । রাগ কোরো না । তুমি আমাকে যা খুশি তাই ভাবতে পারো কিন্তু আমি জানি যে অন্যায় করিনি । বরং তোমাকে মুক্ত করে দিয়েছি । তোমার 'সঙ্গী' থেকে নামতে নামতে ক্রমশ আমি তোমার চাকরে পর্যবসিত হচ্ছিলাম । একজন চাকরের সঙ্গে থাকাটা তোমার মতো অ্যাকশ্বিশড, অ্যাফ্লুয়েন্ট যুবতীর পক্ষে আদৌ সম্মানের হতো না । তুমি যখন গতকাল দুপুরে অফিস থেকে ফোন করে রীতিমতো অর্ডার করার ভঙ্গিতে আজ ধোকার ডালনা রাঁধতে বললে আমাকে তখনই আমি মনস্থির করেছিলাম যে আমাদের লিভ-টুগেদারের পালা এবারে শেষ করতে হবে । আশ্চর্য ! কত সিদ্ধান্তের বীজই যে আমরা নিরন্তর বয়ে বেড়াই কিন্তু কোন মুহূর্তে যে সেই বীজ অঙ্কুরিত হবে তা আমরা নিজেরাই জানি না ।

আগেকার দিনের মেয়েরা, যাদের অর্থনৈতিক স্বাধীনতা ছিল না, যেভাবে রোজগেরে স্বামীর আঙ্কাবহন করে এসেছেন হাজার হাজার বছর ধরে, তাদের মর্মসহচরী এবং নর্মসহচরী হয়েছেন, তাঁদের সন্তান গর্ভে ধরেছেন, লালন-পালন করেছেন হাসিমুখে কখনও একটুও হীনমন্যতা বোধ না করে, তেমন করে কোনও পুরুষ কোনও রোজগেরে নারীর সেবাদাস এখনও হতে পারে না । পারে না, কারণ, আমাদের রক্তে যে হাজার হাজার বছরের প্রভুত্ব রয়ে গেছে । It runs in the blood even to-day. এদেশীয় নারী-স্বাধীনতার এই প্রথম অধ্যায়ে পুরুষের সেই বোধ পুরোপুরি

মুছে ফেলতে পারাটা হয়তো কোনও পুরুষের পক্ষেই সম্ভব নয়। অস্তুত আপাতত নয়। ভবিষ্যতে হয়তো অভ্যেস হয়ে যাবে। তোমার ভাষায়, ‘অব্যেস’।

তাছাড়া, তোমরা তোমাদের মধ্যে অনেকেই, তোমারই মতো, আর্থিক স্বাধীনতা নিয়ে ঠিক কী করবে, কেমন করে তা পুরোপুরি উপভোগ করবে তাও এখনও পুরোপুরি ঠিক করে উঠতে পারোনি। ‘নারী প্রগতি’ মানেই যে জিনিস পরা নয়, ক্রেডিট কার্ডে সই করে যখন তখন যা তা কিনতে পারার স্বাধীনতা নয়, অফিসে কুড়ি তিরিশ হাজারী পুরুষ অধস্তন কর্মীকে প্রচ্ছন্নভাবে হেয় করা নয়, চুল ছোট করে ফেলা নয়, তেলকে বিসর্জন দিয়ে শ্যাম্পুকে মাথায় চড়ানো নয়, তোমাদের এই স্বাধীনতা এবং প্রগতির মূল যে অনেকই গভীরে প্রোথিত তা বুঝতে পারার মতো সুবুদ্ধি এই হঠাৎ-স্বাধীন হওয়া নব্যযুগের তোমরা হারিয়ে ফেলেছ।

চামেলিও কিন্তু অত্যন্ত স্বল্প-শিক্ষিত হলেও প্রগতিশীল নারী। এবং অর্থনৈতিকভাবে স্বাধীনও। তার অত্যন্ত কষ্টার্জিত অর্থ, (যদিও তার পুরো মাসের রোজগার তোমার দু ঘন্টার রোজগারের সমান) তার বৃদ্ধা মায়ের রক্ষণাবেক্ষণ এবং তার মেধাবী ভাইয়ের পড়াশুনোর জন্যে খরচ করে সে। নিজের জন্যে প্রায় বিন্দুমাত্রই না রেখে। এই ‘করাটা’ও এক ধরনের স্বাধীনতাবোধ থেকেই সে করে। কে কী করে, কেমন করে করে, তার চেয়েও বড় কথা সেই করার পেছনে স্বাধীনতা থাকে কী না!

ওর রোজগারটা আসে কোথা থেকে জানো? তোমার বাবা, শিরীষ কাকুর কাছ থেকে। কাকীমা মারা যাওয়ার পর থেকেই তো উনি একা। তুমি তো কলকাতাতে বাস করেও তাঁর জন্যে কিছুই করো না ও করোনি। বলেছ, ‘দ্যাট ম্যান হাজ নট ডান এনিথিং ফর মি হোয়াই শুড আই কেয়ার ফর হিম।’

স্মিতা, কিছু মনে কোর না, যদি আমি বলি যে, তোমরা অর্থনৈতিক স্বাধীনতা পেয়েই ব্যবসাদার হয়ে গেছ। অনেক এন আর আই এরই মতো। ‘আমি-সর্বস্ব’। ‘গিভ অ্যান্ড টেক’ ছাড়া তোমাদের মধ্যে অনেকেই আর কিছুই বোঝো না।

তুমি শিরীষকাকুকে কতবার গাড়ি পাঠিয়েছ তোমার সঙ্গে এসে ডে-স্পেন্ড করার জন্যে, কিন্তু উনি একবারও আসেননি। তোমার মতো স্ট্যাটাস-সচেতন মানুষের পক্ষে চেতলার ওই গলির মধ্যে বস্তির পাশের একতলা বাড়িতে গিয়ে বাবার সঙ্গে সারা দিন কাটানোও সম্ভব হয়নি। তোমার একমাত্র দাদা শোভন, অস্ট্রেলিয়ার সিডনিতে তার অস্ট্রেলিয়ান স্ত্রী ও ছেলেমেয়ে নিয়ে সেটলড। সেও তো লেখে আমাকে, তার দেশ বলে কিছু নেই। কোনও পিছুটান নেই। আর কলকাতাতে থেকেও তোমারও নেই। তোমরা সবাই Rootless হয়ে গেছ। তোমরা সবাই Floatsome।

চামেলিকে তুমি ছাড়িয়ে দেবার পর ওর সঙ্গে কোনও সম্পর্ক আমার ছিল না। ওর ঠিকানাও আমার কাছে ছিল না। ওকে ভাল লাগত আমার কিন্তু তোমার সঙ্গে লিভ-টুগেদার করি যে-আমি তার চামেলির প্রতি অন্য কোনও ইন্টারেস্ট ডেভেলপ করেনি। সত্যি বলছি। আদৌ করেনি। ফুল ভাল লাগলেই কি তা ছিঁড়ে এনে ফুলদানিতে তোলা যায়? না তুললেও তা বাঁচে। কিন্তু শিরীষকাকুর খোঁজখবর আমি নিয়মিত নিতাম। তোমার বাবা বলে তো বটেই তাছাড়া ওঁকে আমি বাবার বন্ধু হিসেবে পছন্দও করতাম বলেও। মাস তিনেক আগে একদিন দুপুরবেলা ওঁকে দেখতে গিয়ে চামেলিকে সেখানে হঠাৎই দেখি। শিরীষকাকু বলেন, আমার আর কোনও দুঃখ নেই বিমু, চামেলি আমার ছেলে ও মেয়ের অভাব পূরণ করেছে। কীই বা দিতে পারি আমি ওকে। পেনশনে কটা টাকাই বা পাই। কিন্তু ও যা করে আমার

জন্যে তা বলার নয়। ফুল কিনে এনে ঘর সাজায়, তোমার কাকীমার ফটোতে ফুলের মালা পরায় রোজ সকালে। যা আমার ছেলেমেয়েরা কখনও করেনি। হাতের রান্নার তো কোনও তুলনাই নেই। ব্যবহার তো অত্যন্তই রেসপেকটেবল। পাশের দুটো ঘর খালি হবে চাটুজ্যে মশায় তাঁর মেয়ে জামাই-এর কাছে চলে যাবেন। এলাহাবাদে। বাকি জীবন সেখানেই কাটাবেন মেয়ে-জামাই-এর আন্তরিক আমন্ত্রণে। ওই দুটো ঘর পেয়ে গেলে, আমি বলেছি, চামেলি ওর মা ও ভাইকে নিয়ে এখানেই চলে আসবে বস্তির ঘর ছেড়ে দিয়ে। ওর মতো সম্ভ্রান্ত মেয়ের পক্ষে ওই বস্তির পরিবেশে থাকা মুশকিল অথচ বস্তির সববয়সী মানুষই 'চামেলিদি' বলতে অভ্যস্ত। বুঝলে বিমু, কিছু কিছু ফুল থাকে, যা সবরকম জমিতেই সমান সৌন্দর্যে ফোটে। তা মরুভূমিই হোক কী তুয়ারাঞ্চল।

শোনো স্মিতা, চামেলির প্রশস্তি করার জন্যে এই চিঠি লেখা নয়। চামেলি আজ ধোকার ডালনা করেছিল শিরীষকাকুর জন্যে। ডাল আরও বাটা ছিল, আমিই বললাম। তোমার জন্যে আবার করতে। তুমি গতকাল খেতে চেয়েছিলে।

তোমার কুশল জিজ্ঞেস করেছে চামেলি সব সময়ই গত তিনমাসে। তুমি যে ওকে ওর বিপদের কথা না বুঝেই নিষ্ঠুরভাবে ছাড়িয়ে দিয়েছিলে সে জন্যে ওর মনে কোনও অভিযোগও আছে বলে লক্ষ করিনি। ভাবটা এমন, 'আবার ডাকিলেই যাইব।' কিন্তু ও চাইলেও শিরীষকাকু, তোমার পিতৃদেব, তাকে 'কচ্ছপের কামড়ে' ধরেছেন। তোমার কাছে অপমানে অসম্মানে কাজ করার জন্যে চামেলিকে তিনি ছাড়বেন না। চামেলির জন্যে তিনি একটা সংপাত্রও খুঁজছেন। গত তিনমাস ধরেই শুনছি। যদিও ও বয়সে আমার চেয়ে প্রায় এগারো বারো বছরের ছোট তবু তোমার পিতৃদেব শিরীষকাকুর মতে সেটাই নাকি বিয়ের পক্ষে 'আইডিয়াল ডিফারেন্স'। কাকীমা মানে, তোমার মা আর শিরীষকাকুর মধ্যে নাকি ওইরকম ডিফারেন্স ছিল। অ্যাশ দে মেড আ ভেরি হ্যাপি কাপল্।

বিবাহযোগ্য চামেলির পাত্র হিসেবে অ্যাপ্রাই করে কি খারাপ করলাম স্মিতা? লিভ-টুগেদার আর বিয়ে তো এক নয়। লাভও আমারই। আমি তো শিশুবধ করলাম। তাছাড়া, চামেলির সঙ্গে অন্যভাবে মিশে বুঝতে পারছি যে আমার মধ্যে একজন প্যাট্রিয়াক-এর রক্ত বইছে। ম্যাট্রিয়াকাল সোসাইটিতে সামিল হতে আমার আরও দু'চার মানব জন্ম লাগবে।

সরি! আজ রাতে তোমাকে পেটে কিল দিয়ে শুয়ে পড়তে হবে কিন্তু তোমার চিঠি লেখার টেবলের ওপর 'বান্টি আন্টিজ' কিচেনের' ফেশন নান্নার আছে। আগামীকাল থেকে ওঁদের বললে তুমি যেমন চাইবে তেমন ডিনার এবং ছুটির দিনেও লাঞ্চ ওঁরা হটকেস-এ করে পাঠিয়ে দেবেন, থাই, চাইনিজ, কন্টিনেন্টাল, ইন্ডিয়ান সব। আজ চান করে উঠে, ব্রাউন ব্রেড আছে, ব্রাউন ব্রেড দিয়ে ধোকা খেয়ে গোটা চারেক ব্লাডিমেরি, ও: তাও তো বানিয়ে দিতাম ছাই আমিই। তোমার বারম্যান না থাকলে তা বানাবেই বা কে? তার চেয়ে অ্যাক্সস্টুরা বিটার্স দিয়ে পিংক জিন বানিয়ে খেয়ে নিয়ে শুয়ে পড়। জানতেও পারবে না কখন রাত পোয়ালো। মাঝরাতে ঘুম ভাঙলে একটু কান্না কান্না ভাব জাগতে পারে। জাগলে, আর একটা বড় জিন মেরে দেবে।

কোনওদিনও বলিনি, আজ বলি যে, আমিও অনেকদিন অনেক রাত কেঁদেছি যখন আমার আত্মসম্মান আমাকে চিমটি কেটেছে, কিন্তু তোমাকে কখনও জানতে দিইনি। ড্রাইংরুমে গিয়ে বারান্দার দরজা খুলে তারান্দার আকাশের দিকে চেয়ে কেঁদেছি, এক হতভাগা পুরুষ।

নামী-দামী জিনিসের মুখ আর দেখা হবে না। খাওয়া হবে না গ্রান্ড ও রা 'জরাজ'-এও, তবে শিরীষকাকুর বন্ধু, তোমার

কর্নেল গোপেন কাকু আর্মি থেকে রিটায়ার করলেও আর্মির রাম পান সস্তায়। দু'বন্ধুতে রোজ সন্ধ্যাতে বসে খান আর টিভিতে ডিসকভারি চ্যানেল দেখেন। তাঁদের প্রসাদ পেলেই চলে যাবে। তবে এখনও তো আমার নতুন দায়িত্ব-কর্তব্য হল, শিরীষকাকুর দেখাশোনা। তাছাড়া চামেলিকেও সুখে রাখতে হবে তো! তাই লেখালেখিতে মন দিতে হবে।

তোমার কীসের অভাব? তোমার কত পুরুষ আছে। মাসে দু'লাখ মাইনে পাওয়া অনুঢ়া সুন্দরীর কোনও অভাব কি থাকতে পারে? ইচ্ছে করলেই ফুল ফুটবে। শুধু ইচ্ছে হওয়ার অপেক্ষা। আমার মতো অপদার্থ তোমার জীবন থেকে বিদেয় হয়েছে তো আপদ গেছে।

তুমি তো সম্ভান চাওনি কখনই। বলতে, মাদার টেরেজার হোমের কাছ থেকে বাচ্চা অ্যাডপ্ট করবে। মা হওয়ার কষ্টের মধ্যে দিয়ে যাবে না তুমি। আমি কিষ্ট চাই। ছেলেবেলা থেকেই চেয়েছি। চামেলিও চায়। আমাদের বেশ দুটো গাবলু-গুবলু বাচ্চা হবে। তাকে তো মন্ট ত্রোস বা ইন্টারন্যাশনাল স্কুল বা লামার্টস বা সেইন্ট জেভিয়ার্স বা লরেটোতে ভর্তি করাবার ঝামেলা করব না আমরা। পড়াব বাংলা মিডিয়াম স্কুলে। তারা বাংলা সাহিত্য পড়বে। সুকুমার রায়, লীলা মজুমদার, শীর্ষেন্দু, ব্যোমকেশ। বাংলা গান শুনবে, কীর্তন, পুরাতনী, রবীন্দ্রসঙ্গীত। একেবারে সাদামাটা বাঙালি করে মানুষ করবে তাকে, যাতে সে তোমার বা তোমার দাদার মতো 'কৃতী' না হয়ে ওঠে।

আমরা যখন বুড়ো হব, মানে, আমি আর চামেলি, তখন সে আর তার বৌ আমাদের দেখবে। আমাদের জীবনে আরাম বেশি থাকবে না অর্থের অভাবে, মানে, অর্থ খুবই কম থাকবে, তবু অর্থের লোভ না থাকতে আনন্দ থাকবে প্রচুর। আমার বা আমার স্ত্রীর বা আমার ছেলেমেয়ের জীবনকে জীবিকা পুরোপুরি গিলে ফেলবে না, তোমাদের জীবনকে যেমন গিলে খেয়েছে। আমরা উপরে তাকাব না, নীচে তাকিয়ে আনন্দে থাকব। সকলেরই যে সব কিছু থাকতে হবে তার কী মানে আছে।

প্রার্থনা করো স্মিতা। আমরা দুজনে যেন সুখী হই।

আজ বড় হিউমিডিটি। লিখতে লিখতে হাতের ঘামে চিঠি ভিজ়ে যাচ্ছে। তবু, আমার এই সিদ্ধান্তের কথা তোমাকে জানানো তো আমার কর্তব্য।

ভাল থেকে।

-- ইতি তোমার বিমু

.....